

史料旬刊

第五期

史料旬刊第五期目錄

唐孫鑄揭帖案

(一) 唐繼祖摺

(二) 唐孫鑄揭帖

雍正安南勸界案

(一) 尹繼善摺

(二) 張應宗摺

割辦案 乾隆三十三年

(一) 富尼漢摺

(二) 廷寄

(三) 廷寄二

(四) 方觀承摺

(五) 軍機處奏片

(六) 諭旨

(七) 富尼漢摺二

(八) 廷寄三

(九) 廷寄四

(十) 廷寄五

(十一) 廷寄六

乾隆二十四年暎咭喇通商案

(一) 李侍堯摺二

(二) 新柱等摺七 附清單

(三) 新柱等摺八

福隆安等奏估修寧壽宮摺

道光朝外洋通商案

(一) 陳若霖摺

(二) 阮元摺

(三) 武隆阿等片

(四)武隆阿等片二

(五)武隆阿等片三

(六)愛孜圖拉供詞

道光十一年查禁鴉片烟案

(一)鄂山摺

(二)覺羅瑞福等摺

(三)內務府摺

(四)瞿溶摺

(五)史譜摺

唐孫鎬揭帖案

唐繼祖奏唐孫鎬揭帖摺

給事中臣唐繼祖謹奏爲逆黨固結請置重典以正人心以彰國憲事臣巡察永順鎮筭等處於二月初十日至沅州地方接據湖北武昌府通山縣知縣井浚正月初六日申文爲檢舉事內開竊卑職自雍正五年十月內蒙各憲委署漢川縣事因庸材初任未諳吏治當在省城延請浙江人唐孫鎬作幕厥後署事石首以及試用今職幕中一切事務俱托此人經管其人性情乖張語言放蕩惟於刑名錢穀頗稱練達卑職薄其人而惜其才是以姑容至今詎上年十一月間孫鎬接閱京報見有諸葛際盛討呂留良之義檄忽然瘋狂大作詈罵號呼無所不至卑職再四勸阻加以切責毫不省悟及至本月初三日忽欲辭去卑職詢其何往據稱將赴憲轅遞呈詰其所呈何事孫鎬取出一稿乃毀罵諸葛際盛之揭帖其中言語甚屬狂悖卑職查閱之下不勝駭異伏念卑職仰沐皇上高厚之恩時圖報効不意幕中有此兇頑胆敢造言生事若縱之使去

日後一經查出難免失察之究除將唐孫鑄嚴行看守外理合據實檢舉并抄錄揭帖一紙呈詳到臣臣閱詳甚爲駭異及閱唐孫鑄逆揭語多悖惡意甚猖狂自云士林公憤借罵諸葛際盛之名爲解釋呂留良之計於唐虞之盛世則公行誣訕於悖逆之巨惡則曲肆推崇掩其不臣之迹比於洛邑頑民指其謗訕之書以爲家藏戲筆又謂其評選制藝與講義語錄諸書闡發精詳能窺聖賢堂奧若焚書滅族孔孟在天之靈亦應流涕等語臣披閱未終不禁心顛髮指夫呂留良身入本朝之庠序親沐教養數十年非頑民可比敢以風影全無之事仰謗列聖其子孫猶敢什襲藏家此何等事而孫鑄以戲筆目之大逆狂悖之心與留良父子何異至留良選賣時文刊刻講章不過爲沽名鬻利之術而孫鑄乃竭力推崇欲以此爲留良末滅之地試思孔孟之道如日中天程朱諸儒之傳註至精至當何待留良之闡發亦豈留良之所能妄窺况孔孟立教首以忠孝爲重似此不忠不孝之人正名教所不容孫鑄乃云看聖賢情面似應少貸侮聖欺君莫此爲甚臣伏見我皇上尊崇先聖表章正學至誠至敬超越千古近者曲阜文廟上樑之日慶雲紛郁瑞應昭然爲歷代史冊未有之盛

事仰見皇上之心卽孔孟之心異代同符若合一轍昔孔子誅少正卯以其言
僞行僻恐其惑世誣民今呂留良之奸邪悖逆罪惡滔天萬倍於少正卯皇上
明正其罪所以明大倫而崇忠孝息邪說以正人心孔孟在天之靈必當欣契
何至反爲流涕方今大道光昌斯文隆盛之時海內士子靡不歡欣鼓舞思欲
驥首皇途效忠盛世而孫鑄乃欲以危言橫議冀聳衆聽不惟狂悖已極亦且
詐惡實深在留良之邪僞惑世孫鑄從前墮其術中已屬愚頑今留良罪惡貫
盈私書敗露明詔煥發炳若日星中外臣民無不知其爲無耻小人大逆賊子
凡沐聖朝之德澤戴天履地稍有人心者咸思食肉寢皮而後快萬口同聲請
加極典諸葛際盛一檄實出士林之公憤天下之人未盡有其檄而實盡有其
心乃孫鑄獨以中外合請之詞爲違心附和之語而於際盛則極口詈罵目爲
奸賊竊思詔誥之風久爲聖明之所厭薄皇上御極以來日令諸臣直言闕失
詳陳政事以忠讜爲先迎合爲戒大小臣工孰敢獻謏貢佞如諭旨宣布呂留
良之罪惡雖千百世後猶將憤其悖逆爲臣子者何能代爲之寬亦何忍代爲
之寬如孫鑄之言是必人人崇奉留良不顧忠孝之大倫而後可其猖狂袒惡

之禍可勝言哉且海內士子若果以誅留良爲憤何以作義檄者有福建泉州之諸葛際盛造逆黨者有廣東連州之生員陳錫等而置牌奉祀之朱振基與請赦呂氏之唐孫鑄皆出於留良之鄉里孰公孰私其爲門牆黨羽不問可見逆黨固結竟不知有倫紀法度所當亟爲誅殛者也伏乞皇上勅下督撫嚴加審訊務究根株將唐孫鑄立置重典庶國憲彰而人心以正矣狂逆嗚吠之詞本不足上塵御覽但語涉謗訕臣心實切憤恨謹據詳繕摺奏聞並將原揭照樣抄錄進呈仰祈皇上睿鑒施行臣謹奏雍正八年二月十三日

抄錄唐孫鑄揭帖（原名）

浙江紹興府會稽縣唐孫鑄爲小人之醜態畢露士林之公憤難禁謹瀝冒死之愚衷以救將喪之斯文事竊惟好善惡者人生同具之良殺身成仁者志士獨鍾之氣孫鑄浙左布人秉性耿介夙有志願銘刻在心若遇不平之事必以死爭之茲者閩奸諸葛際盛天良喪盡妄作謗書上蔽聖聰下欺士類幾令吾道淪胥斯文掃地此誠危急存亡之秋欲死已得其所將死之言庶裨萬一

願當事大人少垂鑒察則死且瞑目伏念我皇上御極以來澄清吏治綱舉目張撫恤民生利興弊絕勵精圖治之盛心實秦漢以來僅見之明主而說者動以唐虞擬之則失其實矣夫唐虞之世上有堯舜爲之君下復有舜禹皋夔稷契爲之臣都兪吁咈君臣交贊故治化臻於極隆爲千古之所莫尙今也不然皇上曰可臣亦曰可皇上曰否臣亦曰否上有憂勤之聖而下無翼贊之賢此其所以遜於唐虞也即如呂留良著書一事皇上降旨之初尙在疑信相參苟使公卿大臣舉留良所著之正書而力爭之則崇儒重道之聖心自必油然而動無如內外臣工恐干批鱗之咎甘作違心之談此曰挫骨彼曰揚灰此曰焚書彼曰滅族舉朝同聲附和而宸衷益增其怒矣然而聖主好生之德覆載同寬縱使百爾臣工皆曰可殺猶將遍詢於國人以求其一線之生路詎有諸葛際聖者蛇蝎爲心豺狼成性未奉明詔擅作檄文飾奸爲忠希圖倖進孫鑄披閱之餘不禁髮指竊恐此人得志吾輩死無噍類不得不披肝瀝胆剖心泣血爲當事大人陳之其檄云留良私造日記捏誣聖德夫際聖果親見此書何不於諭旨未降之先明揭其奸以申大義乃於事覺之後而始發聲狂吠小人之

醜態畢露矣又云留良之子孫窩隱毒孽固結不改夫留良所著之書盈几充棟爲子孫者豈能於遺編千卷之中吹毛求疵而泯其跡此亦事之無足怪者又歷叙我朝之世德而爲詰問之辭夫太祖太宗之功業半在留良生前聖祖與皇上之勳猷半在留良死後舉其生前死後之事以詰之此誠千古之怪談也又指留良爲呂產呂祿呂布之後而自稱爲諸葛武侯之裔夫呂姓之不肖者近代尙不乏人何不云福建之呂惠卿之族類而反遠追產祿乎推其意必以惠卿之品行可師可法是以隱忍不言耳至於武侯子孫捐軀報國靡有子遺史載昭然嶺南支派多係亂臣諸葛恪之後際盛豈即其種類耶不然何其性情之相似也且際盛獨不見四書講義乎講義一書闡揚聖道至精且詳海內文人莫不宗之聖人復起不易其言惜乎皇上日理萬幾無暇繙閱此書而左右近臣又因聖怒未解不敢冒昧進呈致使留良家藏之戲筆日暴日彰傳世之嘉言日隱日沒而讒詔小人遂乘間而肆其訕謗矣其最可危者外僚之奏未齊廷臣之議未定而自際盛吠聲一作即有一二敢言之臣亦爲之氣阻萬一我皇上誤信其言以爲國人皆曰可殺殆無疑竇將見焚書燬板即在目

前夷族戮屍諒難寬假傷心哉古聖賢之奧義悉付諸崑岡烈火之中數十載之枯骸飛揚於青天白日之下尙陽堡內朝朝聞穉子之啼天蓋樓頭夜夜聽幽魂之泣讀書明理之士無不爲之寒心孔孟在天之靈亦應爲之流涕可憐八十餘年養士之恩幾幾乎墮於奸賊一人之手當事大人皆弗能救與能救則此其時矣尙何待乎如其不能請將此檄繕呈御覽並將孫鎬解赴京師願與奸賊際盛面質於勤政殿前俾孫鎬一片赤心得表白於大廷雖置鼎鑊解衣就烹倘蒙聖主垂憫愚忠恩施格外赦呂氏闔門之罪焚其邪說留其餘書斬際盛之頭以懸示天下上自公卿下逮庶人有不同聲稱快者孫鎬甘心寸磔以報我皇上必無悔然則留良果無過乎而非也留良之過誠大矣留良之功亦不小當我朝定鼎之初海氛未清東南諸郡尙多洛邑頑民留良自附前代儀賓之後不覺悞入頑民之列此其過也至其生平著作若講義若語錄與夫評選兩朝制藝反覆辨論義理透徹直能窺聖賢之堂奧兼可啓後世之顛蒙此其功也雖筆底微勞不足以蓋逆天大罪然看聖人情面似應少爲之貸此則大公至當之論也然則皇上之諭旨猶有未協乎而非也皇上目之所見

惟此數章邪說苟使半載以前早閱留良講義等書聖明必爲之擊節總之天威之震怒耳目未周也臣工之緘默顧恤身家也而際盛之狂吠則是行險以徼倖也夫殺一庸夫俗子以竊取富貴人情尙有所不忍奈何親讀其書身受其益而欲殺其滿門以求逞其欲豈非衣冠中之禽獸乎孫鑄草茅下土何敢掠美市恩也作威作福惟辟主之事濟則君之恩也國之福也士之幸也於孫鑄何功之有不濟則身受極刑貽笑天下尙有何美之可掠何恩之可市哉孫鑄時凜聖訓何敢袒護同鄉也言背乎理縱秦越其奚補言順乎情雖鄰里亦何傷况浙水東西昔分吳越先世無葭李之親後輩無一日之雅固不必引避嫌疑也孫鑄生逢盛世何敢背逆天命也文運之隆替關乎世道之盛衰考諸往古歷有明徵矣今之文運不爲不隆若人人效際盛之猖狂未必不流於替故當無可如何之際而迫爲不得不然之辭聊以報君恩於萬一耳是檄也感悟天心十之一身罹法網十之九然與其與無耻之諸葛際盛並生陽世何如與儒雅之呂氏父子同歸陰府也嗚呼仲山甫之不作魏鄭公之已亡朝廷已無諍臣草野復生孽畜後之修史者不幾笑我朝無人物乎雖然莫謂無人也

猶有不怕死之唐孫鎬在雍正八年正月日

雍正安南勘界案

尹繼善摺

臣尹繼善謹奏爲奏明遵旨辦理遷隆設隘情形仰祈睿鑒事雍正十二年正月二十二日兵部火票遞到雍正十一年十二月初十日內閣奉旨密諭據張溥奏稱廣西遷隆峒土官黃震中聽練總廖廣圖利與安南之萬甯州土目構釁並將遷隆峒移文抄呈等語朕細覽情節起釁之由實自練總廖廣而從前勘界委員或未經詳查惟聽土官之言遂爾立隘設防亦未可定但安南土目語意倨慢漸不可長而該國新喪暫又未便理論著張溥傳諭尹繼善金鉉張應宗等且不必移詢安南國王並佯爲不知密差查隘先將練總廖廣嚴拏究治以服其心如地界果有侵佔即明示賞還不可支飾回護倘我並無侵佔而彼敢於構釁督提大吏亦暫不必行文密令鎮道等移咨開導先示寬大而後加嚴切庶得理得體而措置無難欽此並抄發廣東提臣張溥原摺到臣臣查此案先於上年十一月內准廣西撫臣金鉉咨會准安南國王咨稱萬甯州與

遷隆接壤限以小河一帶疆域宛然今遷隆土州差目不於內地隘口設汛乃於萬甯州之渠那卹掛牌建營請查明舊跡申飭差目撤回等語臣以事關邊境隨即飛檄飭查旋據左江鎮臣霍昇南甯府知府張漢各稟報從前查勘設隘時因土官指稱渠那地方係入隘總口向曾設隘於康熙三十二年撤去今應復設總隘勅員據以詳題今細察情由因彼處爲陵陞私鹽出入之所陵陞土目於此抽收鹽稅土目廖廣黃賢光貪圖其利愚弄土官指爲舊隘致起爭端臣正在行查間接奉密諭跪讀之下仰見我皇上懷柔外域至大至公指示機宜無遠弗照俾臣等得有遵循不致辦理錯謬當即札致撫提二臣悉心商酌隨據南甯府知府張漢稟稱奉撫臣諭令親至渠那會同安南萬甯州土目會勘界址臣查渠那屬內屬外原可詳訊土目即得明晰現經奉旨不必移詢安南先密差查隘自當遵旨辦理未便以知府大員輕至夷地與外域土目張揚會勘不特恐起夷民驚疑且一經會勘倘夷目稍不遜順未免難於收拾所關匪細隨即專差馳驛飛諭該府先將廖廣黃賢光拏究以服陵陞之心一面密行查勘的確具報再爲酌奪斷不可與夷目會勘亦不可支飾迴護去後茲

據該府稟稱業經起程前往會勘於遷隆途次接到差諭隨即回轉與原勘之上思州知州仇雲標於遷隆一路查勘並傳土官土目人等查詢遷隆地方原有十萬大山以限中外山外有小河一條河之南名爲八舍渠那卽八舍中之一邨向屬安南管轄服習言語悉係安南風俗錢糧亦在安南上納遷隆官目從不過問所稱向於渠那設隘於康熙三十二年撤去之處毫無憑據遷隆通陵右路原於平微邨設有淦梯一隘左路於汪灘邨設有板蒙一隘撥土兵防守俱在十萬山之內是八舍確非遷隆地土實係土目廖廣黃賢光貪圖彼處鹽稅愚弄土官朦混勘員詳題設隘情節甚明已於二月初十日將廖廣黃賢光擊獲卽在遷隆地方嚴行責處仍帶回府城監禁另行審詳其遷隆與安南應以十萬山外之小河爲界河南屬外河北屬內再該峒在平微邨所設之淦梯隘汪灘邨所設之板蒙隘俱尙有僻路可通不能總禦防範應將淦梯隘移於十萬山脚之剝馬邨板蒙隘移於十萬山脚之栢心邨均無僻路實爲總口等情繪圖貼說稟復前來臣細加查核八舍旣實非遷隆所轄從前朦混情弊已據土目供明今細勘形勢實以十萬山外小河爲界又與安南來文相合自

當仰遵諭旨將八舍地方明示賞還以昭寬大但咨覆安南亦須得體似應將從前設隘原因防範奸匪稽查私鹽乃土目廖廣等貪圖鹽利朦混動員於渠那設隘今已將廖廣等嚴拏重究該國地方均屬朝廷版圖何分彼此八舍既向屬該國地界自應仍令該國管轄以專責成該國嗣後應加謹巡防不許私販流入內地萬甯夷目先則私收鹽稅繼令販棍流布又與遷隆土峒舞弄筆墨出言放肆該國王應卽懲治以儆不法如此咨覆安南似爲妥協但臣衙門未曾准有安南來咨不便行文業經札致撫臣查照咨覆一面將應設隘口照議改設至上思州知州仇雲標從前委勘不實今雖自行查出亦難寬貸應聽撫臣具題請旨所有查明渠那地方實非內地並遵旨辦理情形理合恭摺奏聞再此案事關重大必須與撫提二臣商酌妥確查一辦理滇粵相隔較遠郵遞往返以致奏覆稍遲合併陳明伏乞皇上睿鑒施行謹奏

雍正十二年六月初一日硃批是

提督廣西總兵官臣張應宗謹奏爲遵旨辦理遷隆設隘情形事雍正十二年正月初十日臣接奉兵部遞到雍正十一年十二月初十日內閣奉旨密諭據張溥奏稱廣西遷隆峒土官黃震中聽練總廖廣圖利與安南之萬寧州土目構釁并將遷隆崗移文抄呈等語朕細覽情節起釁之由實自廖廣而從前勸界委員或未經詳查惟聽土官之言遂爾立隘設防亦未可定但安南土目語意倨慢漸不可長而該國新喪暫又未便理論著張溥傳諭尹繼善金鉷張應宗等且不必移詢安南國王并佯爲不知密差查隘先將練總廖廣嚴拿究治以服其心如地界果有侵佔即明示賞還不可支飾回護倘我并無侵佔而彼敢於構釁督提大吏亦暫不必行文密令鎮道等移咨開導先示寬大而後加嚴切庶得理得體而措置無難欽此併抄發廣東提臣張溥原摺到臣臣先於上年十月內准撫臣金鉷咨准安南國王咨稱萬寧州與遷隆接壤限以小河一帶南北對岸疆域宛然今遷隆土州差目不於內地隘口設汛乃於萬寧州之渠那村掛牌建營請查明舊跡申飭差目撤回等語臣准咨之後正在與督撫二臣商酌辦理間接奉密諭臣跪讀之下仰見我皇上至聖至明無遠弗照

適南寧府知府張漢自省謁撫臣回過柳州據稟奉撫臣諭令親至渠那會同安南萬寧州夷目勘明界址臣隨劄商撫臣云現今奉到諭旨有不必移詢安南并佯爲不知自應遵旨辦理此時知府不宜輕與夷目會勘况現經知州千總踏勘方回若知府又親臨會勘文武絡繹邊境恐啓夷目驚疑必須先將廖廣拿獲再訊詢遷隆土司渠那地方果屬內屬外若係安南地土仰遵諭旨明示賞還重懲廖廣庶爲得理得體臣旣商之撫臣一面飛劄聞之督臣旋接撫臣回劄云未奉諭旨之先西省現在辦理之處聖明尙未照察亦不知該國王已有咨請之文並該地方原屬安南是以不必移詢之諭旨今已據該地文武會勘明晰其曲已在遷隆茲張守此行再加確訪若果如此便可將渠那汛作何酌設定立邊界八舍地方即遵旨賞還而遷隆土官捏詞侵佔之處查明題參則此案即可歸結至廖廣等先已逸去其情虛畏罪可知仍飭遵旨嚴拿究治獲日另結再張守保守土之官與差委之大員有間似無絡繹邊境之嫌夷目必不致有驚疑之慮等語而督臣尹繼善奉到密諭又據南寧府張漢稟報親往渠那會勘情節卽專差馳驛飛諭張漢併手劄致臣云現今奉旨不必移

詢安南自當遵旨辦理未便以知府大員輕至夷地與外域土目張揚會勘不特恐啓夷目驚疑且一經會勘儻夷目稍不遜順未免難於收拾所關匪細已諭張守會勘之行併飭先將廖廣黃賢光拿究以服交趾之心密行查勘的確具報再爲酌奪隨據南寧府張漢稟稱卑府奉檄已起身會勘途次接奉督院專差諭飭斷不可親往與夷目會勘隨即轉回與原勘之上思州知州仇雲標於遷隆一路查勘併傳土目人等查詢遷隆地方原有十萬大山以限中外山外有小河一條河之南名爲八舍渠那即八舍中之一村向屬安南管轄服習語言悉係安南風俗錢糧亦在安南上納遷隆官目從不過問所稱向於渠那設隘於康熙三十二年撤去之處毫無憑據遷隆通交右路原於平徼村設有淦梯一隘左路於汪灘村設有版蒙一隘撥土兵防守俱在十萬山之內是以八舍確非遷隆地土實係土目廖廣黃賢光貪圖彼處鹽稅愚弄土官朦混勘員詳題設隘情節甚明已於二月初十日將廖廣黃賢光拿獲即在遷隆地方嚴行責處仍帶回府城監禁其遷隆與安南應以十萬山外之小河爲界河南屬外河北屬內再該崗在平徼村所設之淦梯隘汪灘村所設之版蒙隘俱尙

有僻路可通不能總禦防範應將淦梯隘移於十萬山脚之剝馬村版蒙隘移於十萬山脚之栢心村均無僻路實爲總口併繪圖貼說稟覆前來臣細閱知府張漢所稟頗爲明晰妥協似應照議辦理隨相聞督撫二臣茲於六月初一日准撫臣金鉉咨覆安南移文內開據布按二司詳據南寧府詳查遷隆崗與安南萬寧州交界原設有版蒙淦梯隘二版蒙隘原設於汪灘村淦梯隘原設於平微村前查勘之時至汪灘平微二村該崗土目黃賢光妄指二十餘里村名渠那爲二隘總口向設隘房於康熙三十二年間廢棄今應復設遂以應在渠那設隘等情詳覆具題今平微汪灘二村外二十餘里有剝馬栢心二村冒作渠那其實渠那原屬安南萬寧州並非遷隆所轄今查明內外界址應以十萬山脚之小河爲限河南屬萬寧河北屬遷隆渠那在八舍之中八舍在小河之南應將八舍地方俱歸萬寧州管轄遷隆添設之汛應改設於栢心剝馬二村應飭該管官加謹巡防不許私鹽販棍流入內地更不許容留漢姦再行多事至萬寧州夷目潘弘曜旣知非遷隆所轄理應申報國王咨會本省督撫自必檄飭清理何得輒行率衆毀示專擅膽玩且咨移遷隆崗來文語近傲慢大

失體制併請咨明安南國王將潘弘曜嚴加究治以昭恭順等情除渠那歸還萬寧州會疏核題併咨安南國外移咨到臣查此案業經遵旨辦理所有情節臣謹繕摺奏聞伏乞皇上睿鑒施行謹奏雍正十二年六月初十日

硃批「覽」

割辦案 乾隆三十三年

富尼漢摺

山東巡撫臣富尼漢跪奏爲奏聞事竊臣於五月內聞省城有剪人髮辦其人卽昏迷之事臣以事關邪術迷人不可不嚴密查拿切實根究當卽密諭濟南府知府徐績歷城縣知縣胡德琳慎密訪緝并諭臬司尹嘉銓飭屬一體留心偵拿毋稍疎縱臣於六月初三日自省起程赴兗州鎮標巡閱營伍初十日至兗州府據知府覺羅普爾泰稟稱據鄒縣嶧縣拿獲剪人髮辦人犯二名一名蔡廷章一名靳貫子并被靳貫子剪辦迷拐之靳玉子到郡臣隨率同兗沂曹道毛嘉梓兗州府知府普爾泰提犯悉心研鞫據蔡廷章供係四川人乾隆三十一年七月內到京在西四牌樓隆長寺寓歇賣字度日與趕會募化之僧人通元認識旋因貧苦難度三十二年十二月內出京三十三年二月內在揚州城外撞遇通元並其徒怡興怡德怡安通元告以浙江仁利縣俗家張姓王姓僧人吳元頗有法術用迷藥彈人之面其人立卽昏迷乘間剪其髮辦口念咒

語卽可攝取其魂將髮辮紮成紙人紙馬可以取人財物招伊入夥該犯向通元學習咒語通元令怡安爲其剃髮偕同北上隨路剪人髮辮五月內來至濟寧河涯分路行走五月十八日至鄒縣中山店該犯向通元討取迷藥乘民人郝國坦向飯舖買饒將藥彈其面上用小刀割其髮辮當被縣役拿獲通元乘間潛逃據斬貫子供係章邱縣人本年五月初八日在本縣濮村三清觀內遇素識之江南算命人張四儒並其同伴鄒平縣人劉成子濟陽縣人張天祥李坤張四儒告知江南宿州石庄青龍寺僧人玉石有法割人髮辮紮成紙人紙馬可以取人財物邀其入夥張四儒給予迷藥剃刀并囑其隨便迷拐幼童以作盤費各犯分路行走五月十一日該犯在章邱蕭庄集迷拐幼童斬玉子強行鷄姦十七日至嶧縣棗庄地方該犯割取幼童李狗髮辮被縣役拿獲各等情臣查奸匪逞其邪術散布黨羽行踪詭秘流毒閭閻大爲風俗人心之害且現獲之蔡廷章斬貫子二犯一稱係浙江僧人吳元爲首一稱係江南僧人玉石爲首兩地邪術如出一轍正恐其間尙有潛伏之巨魁窩藏之巢穴跡其散夥四出迷誘煽惑亦恐不僅於圖取財物尤須徹底根究務絕根株以靖地方

除密咨兩江督臣浙江江蘇安徽各撫臣並密飭所屬一體迅速嚴拿查辦一面飭委知府普爾泰將現犯親押赴省檄行兩司嚴加究審俟臣巡閱營伍回省再行覆審定擬具奏外理合將獲犯究審緣由先行奏聞並另繕供單恭呈御覽伏乞皇上睿鑒謹奏

乾隆三十三年六月十六日奉硃批已有旨了欽此

廷寄

大學士公傅大學士尹大學士劉字寄山東巡撫富乾隆三十三年六月十六日奉上諭昨聞山東江浙一帶地方有傳言偷割髮辮衣襟以爲壓勝之用者已降旨各該督撫等令其嚴拿究治今富尼漢奏到據鄒縣嶧縣等處拿獲剪辮之蔡廷章斬貫子二犯現在飭提究審等語此等匪徒逞其邪術迷誘善良爲閭閻之害不可不嚴行查辦痛絕根株此案經地方官留心體訪及時拿獲各犯頗屬能事著富尼漢於審辦完案後將實力訪拿之員出具考語送部引見至此案要犯通元據供在濟寧乘間脫逃恐尙潛匿該省地面且該犯等分

路四出行踪詭秘恐夥黨未經敗露者尙多該撫務宜飭屬徹底根究務獲毋令潛藏外逸致兇頑得以漏網現已傳諭江浙二省令其實力緝如有應行知照之處卽行文移密速查辦欽此遵旨寄信前來

廷寄二

大學士公傳大學士尹大學士劉字寄兩江總督高江蘇巡撫彰浙江巡撫永安徽巡撫馮乾隆三十三年六月十六日奉上諭昨聞山東浙江一帶地方有傳言偷割髮辮之事業經降旨令各該督撫嚴拿究治今據富尼漢奏到東省鄒縣嶧縣等處已經拿獲匪犯二名一蔡廷章係浙江僧人吳元爲首一靳貫子係江南僧人玉石爲首現在嚴加審究等語此等邪術迷人行踪詭秘大爲閭閻之害伊等匪黨未經發覺者自必尙多富尼漢現已行文江浙體訪跟緝著傳諭各督撫等務卽專派妥員將現在有名未獲各犯及同案黨羽一併嚴密查拿盡法懲治以絕根株毋得稍有踈縱致令聞風遠颺欽此遵旨寄信前來

方觀承摺

直隸總督臣方觀承謹奏爲奏聞事竊臣聞江浙地方忽有匪類割人髮辮之事被割者即便迷惑改常或至因此殞命漸已延及山東當即嚴飭交界之景州等營預爲防範查拿茲據景州知州張在稟稱州境內有被割髮辮二人一係鄉農孟士會一係賣餅人夏葛白俱於夜間被剪髮辮四五寸緣夏夜失扇門戶及至驚醒其人已不知所在隨將髮辮全行剃去未致受害近有用青蒿葉本金銀花獨蒜煎洗可解其毒等語臣聞之不勝駭異細加訪問其餘割人髮辮時比即知覺尙可擒獲無如割後始覺者居多故被獲者絕少邪術叵測竟不知其意欲何爲觀其蔓延數省匪黨必多亟應設法訪拿嚴究根株以除民害臣現在通縣營縣遴選兵役懸立重賞責令於坊店寺院食頓住宿之地分頭躡緝如有面生可疑之人卽加盤問露出詭密形蹟立即搜查搜出剪刀斷辮及藥包等物卽交該府縣先行嚴究仍解省鞠訊務得爲首主使之保人保斷省城臣已派撥弁兵會同捕役預爲加意訪查理合奏聞伏乞皇上聖鑒謹

奏乾隆三十三年六月二十二日奉硃批知道了欽此

軍機處奏片

方觀承所奏匪徒偷剪髮辮一摺臣等擬寫諭旨進呈俟發下臣等卽隨同方觀承摺封固交與賚摺家人祇領速回謹奏六月二十二日

諭旨

乾隆三十三年六月二十三日軍機大臣奉旨據方觀承奏景州境內有被割髮辮民人孟士會夏葛白二人伊等隨將髮辮全行剃去未致受害並用藥煎洗解毒等語此等匪徒前經降旨飭令山東等處嚴密查拏今直隸亦有此案尤當詳加跟究孟士會等如因髮辮被剪恐其毒氣傳染因而暫行剪剃將來仍舊留髮尙屬愚民情理所有且恐被害人類此者亦復不少自可毋庸推求如竟甘心剃髮爲僧並不自顧父母妻子則踪跡可疑其中轉不無暗通匪黨情事自應詳悉究訊務得確情著傳諭方觀承卽將孟士會等二人委妥旨解

京交軍機大臣詢問後發廻至此等奸匪來自何方藏匿何所並著該督飭屬
寔力搜查毋得令其漏網欽此

富尼漢摺二

山東巡撫臣富尼漢跪奏爲覆奏事本年六月十七日臣在泰安會勘廟工承
准大學士公傅恆等寄信內開乾隆三十三年六月十二日奉上諭聞江浙一
帶有傳言起建橋座因而偷割髮辮衣襟等物以爲厭勝之用者云云欽此寄
信到臣臣查匪徒造作僞言容易煽惑民聽誠如聖諭亟須留心查禁以杜淺
風臣前在省時即聞有偷割髮辮其人昏迷之事當卽飭屬嚴密訪緝嗣臣巡
閱營伍於六月初十日至兗州府據知府覺羅普爾泰稟獲蔡廷章靳貫子二
犯臣提犯隔別究訊據該犯等供出係逸犯僧通元張四儒招其入夥並稱一
係浙江僧人吳元爲首一係江南僧人玉石爲首散布黨羽用藥迷割紮成紙
人紙馬取人財物且乘間迷拐幼孩賣作盤費事關邪術迷人行踪詭秘流毒
閭閻大爲風俗人心之害亟須徹底審究務絕根株以靖地方隨將該犯等委

員押解赴省檄行兩司嚴究一面密咨兩江督臣浙江江蘇安徽各撫臣迅速嚴拿查辦當將獲犯究審緣由具摺奏聞在案除欽遵諭旨飭屬有以查拿並俟臣巡閱營伍回省再行提犯覆審定擬具奏外理合先行覆奏伏乞皇上睿鑒謹奏

乾隆三十三年六月二十三日奉硃批另有旨諭欽此

廷寄三

大學士公傅大學士尹大學士劉字寄山東巡撫富乾隆三十三年六月二十三日奉上諭前據該撫奏拿獲偷割髮辮匪犯二名當即降旨務即悉心體訪密速跟緝究治並傳諭江浙督撫等一體查拿以絕根株昨據方觀承奏直隸景州地方亦有被割髮辮之事可見此等奸匪竟至蔓延直隸夥黨甚多其在山東潛藏出沒者恐不僅止現在發覺之一二人矣不可不及時設法搜捕以除民害今日該撫奏到提犯審擬一摺亦只辦理前案未有續獲之犯其江南浙江關拿爲首惡僧想亦尙未到案除一面寄知該省督撫實力嚴緝外著再

傳諭富尼漢卽行盡法質訊令該犯等將惡黨一一供出並簡派幹員上緊密緝嚴拿以靖地方毋得稍有疎縱並嚴訊其竄入直隸一帶係何姓名隱匿何所務令據實招出以憑分路偵緝仍將審訊確供及查拿有無續獲情形卽速奏聞欽此遵旨寄信前來

廷寄四

大學士公傅大學士尹大學士劉字寄江省督撫安徽巡撫浙江巡撫乾隆三十三年六月二十三日奉上諭前聞山東江浙一帶有用藥迷人偷割髮辮之事當卽降旨各督撫留心嚴緝究治以除民害嗣據山東巡撫富尼漢奏到東省鄒縣嶧縣等處已經拿獲匪犯二名一係浙江僧人吳元爲首一係江南僧人玉石爲首復諭該督撫等務將首惡餘黨嚴密查拿今復據方觀承奏景州境內有被割髮辮之孟士會等二人可見此等匪徒傳播邪術者已蔓延數省而東省供出造謀爲首則浙江僧人等乃其渠魁不可不剋日就獲俾案內奸徒盡行敗露以安良善而靖地方况據富尼漢移關江浙之文既有指名處所

何以尙未查拿到案又首兇潛匿之地黨羽必多該省豈早無見聞更何以至今別無發覺之犯著卽傳諭該督撫等將現在爲首要犯吳元等及案內同夥各犯一併上緊緝拿嚴究毋得稍有疎縱遲延致令聞風兔脫並將現在查辦情形卽速奏聞欽此遵旨寄信前來

廷寄五

大學士公傅大學士尹大學士劉字寄兩江總督高安徽巡撫馮江蘇巡撫彭浙江巡撫永乾隆三十三年七月初四日奉上諭前聞江浙山東一帶有用藥迷人偷割髮辮之事卽降旨令該督撫等嚴行訪緝究治嗣據山東巡撫奏到鄒縣等處拿獲匪犯二名訊係江南宿州僧人玉石浙江仁和縣僧人吳元爲首因復諭該督等切實查拿今直隸境內亦查出有割辮情事而京城現在並盤獲匪僧確切跟究此等匪徒傳播邪術蔓延數省其爲首之人實始於江浙奸僧潛匿該處已久豈竟絲毫不露形跡該督撫等平時卽應飭屬盤緝奸宄况境內現有割辮之事尤當督飭各州縣並派委妥幹之員上緊環尋首先拿

獲何以山東直隸及京城俱經捕犯破案而江浙等省轉未曾緝獲一二亦未見據實奏聞督撫身任封疆所司何事地方有如此奸匪不能覺察查拿已屬非是及經朕降旨查詢又閱多時迄今猶未覆奏苟非該督撫等於地方事務漫不經心何致毫無聞見抑或曾經稟報置若罔聞竟不復加深究似此養奸縱惡何以安良善而靖閭閻著再傳諭該督撫等速將爲首及夥黨各犯一併實力嚴拿務獲並將現在曾否獲犯及如何設法緝捕之處迅卽據實奏聞如再仍前疎懈致要犯久稽弋獲則延玩之咎不能爲該督撫寬也欽此遵旨寄信前來

廷寄六

大學士公傳大學士尹大學士劉字寄直隸總督方乾隆二十三年七月初五日奉上諭前據方觀承奏景州地方民人孟士會等被奸匪偷割髮伊即將髮全行剃去其中情事可疑已降旨令該督將孟士會等解赴軍機處詢問其偷割髮辮匪犯至今未據弋獲該地方官何以不上緊查拿現在京城盤獲割

辦匪僧正在審究該犯籍係山東於京城發覺而直隸乃往來必由之路且此等奸徒散布夥黨蔓延數省直屬豈竟毫無踪跡著卽傳該督一面將孟士會等卽行送京外一面仍密委幹員嚴查速辦務令要犯速獲並搜捕餘黨淨絕根株毋得稍有疎縱致令聞風遠颺欽此遵旨寄信前來

乾隆二十四年嘆咭喇通商案

李侍堯奏請將本年洋商已買絲貨准其出口摺

兩廣總督臣李侍堯謹奏爲請旨事竊臣於乾隆二十四年八月十七日准撫臣託恩多咨開准戶部咨大學士會同議覆御史李兆鵬條奏請嚴絲出外洋之禁一摺內開應如所奏行令江浙各督撫轉飭濱海地方文武各官嚴行查禁倘有違例出洋每絲過一百斤照米過一百石之例發邊衛充軍不及百斤者杖一百徒三年不及十斤者枷號一個月杖一百爲從及船戶知情不首告者各減一等船隻貨物俱入官其失察之汛口文武各官亦請照失察米石出洋之例分別議處等因奉旨依議欽此欽遵咨會到臣伏查粵東地處邊海向爲外洋商泊雲集之所如本港船係內地商民前往嚙喇吧等處貿易其載運出口貨物亦有携帶絲貨者今既奉文飭禁自應以文到之日爲始凜遵實力嚴查務無透漏惟外洋各國夷船到粵販運出口貨物均以絲貨爲重每年販買湖絲並紬緞等貨自二十萬餘斤至三十二三萬斤不等統計所買絲貨一

歲之中價值七八十萬兩或百餘萬兩至少之年亦買價至三十餘萬兩之多其貨均係江浙等省商民販運來粵賣與各行商轉售外夷載運回國向無禁令且經分立規條按則收稅相沿已久今絲貨禁止出洋亦應一體曉諭各夷商毋許再行收買携帶出口且查絲貨爲外夷必需之物歷年來至內地販運經營其仰賴於天朝普沾惠澤者本自不少乃近年嘆咭喇夷商屢次抗違禁令必欲前赴寧波開港情殊可惡今絲貨禁止出洋不特有裨內地民用並可阻抑外夷驕縱之氣俾知炯戒尤爲妥協惟是外洋夷船聞係五六月收泊進港至九十月出口回帆遲則風信不順難以歸棹本年陸續進口夷船共計二十三隻除噉啞一船原係上年壓冬之船已於五月內出口外其餘二十二船各夷商已將出口貨物漸次收買齊足或已駁運下船或貯行館待運若必令其將所買絲貨退出在售賣之客販已經得銀回籍行商資本微薄無力墊還價本而粵東僻處一隅價值數十萬金之絲貨一時無從銷售必致各夷商船不能乘風趁帆歸國似又無以仰體我皇上柔遠恤商至意臣不揣愚昧恭摺奏明可否仰邀聖恩外洋夷船絲禁以乾隆庚辰年爲始其本年各夷商已

買絲貨准其載運出口遠夷不致守候變售貽誤歸棹咸沐德澤於無既矣至洋船出口之期已迫若專差馳奏往返計需兩月有餘恐致辦理不及是以冒昧附入海關審案彙封由驛賫遞合併陳明臣謹會同廣東撫臣託恩多合詞恭摺具奏伏乞皇上聖鑒訓示謹奏

乾隆二十四年九月初四日奉硃批如所議行該部知道欽此

新柱等奏各關口規禮名色請刪改載於則例內摺

臣新柱朝銓李侍堯謹奏爲請除外洋夷船規禮之名色以杜弊混以協體制事臣等欽奉諭旨查審監督李永標一案檢閱粵海關則例內開外洋番船進口自官禮銀起至書吏家人通事頭役止其規禮火足開艙押船丈量貼寫小包等名色共三十條又放關出口書吏家人等驗艙放關領牌押船貼寫小包等名色共三十八條頭緒紛如寔屬冗雜臣等查直省各關從無規禮名色載入則例獨粵海關存有此名者因從前此等陋規皆係官吏私收入己自雍正四年起管關巡撫及監督等節年奏報歸公遂同正稅列入例冊循行已久自

當仍舊徵收但存此規禮名色在口人役難免無藉端需索情弊應請皇上勅交新任監督尤拔世會同督撫將此項規禮等名目一概刪除合併核算改刊每船進口歸公銀若干出口歸公銀若干俾歸一定既于歸制相協蠹役奸胥亦不能藉端弊混矣抑臣等更有請者外洋夷船既經更定則本港洋船及別省至粵船隻一切規禮名色均請刊改歸公二字以臻畫一再則例內開載瑣碎各口參差不齊易啓在口人役高下其手之弊亦請勅交監督會同督撫詳加核定以垂永久所有外洋夷船進口出口規禮名目謹照則例繕具清單恭呈御覽是否有當伏乞皇上聖鑒謹奏

乾隆二十四年九月初四日奉硃批李侍堯會同尤拔世詳議具奏欽此

清單

謹將粵海關徵收外洋番船進口出口各項歸公規禮名色查照現行則例開具清單恭呈御覽

計開

丈量洋船收火足僱船銀三十二兩

官禮銀六百兩

法蘭西加一百兩
磁喇減一百兩

通事禮銀二百兩

管事家人丈量開艙禮銀四十八兩 小包四兩

庫房規禮銀一百二十兩 貼寫十兩 小包四兩

稿房規禮銀一百一十二兩 掌按貼寫四兩 小包二兩八錢內八錢掌按小包

單房規禮銀二十四兩 貼寫二兩 小包一兩

船房丈量規禮銀二十四兩 小包一兩

總巡館丈量樓梯銀六錢 又規銀一兩

東砲臺口收銀二兩八錢八分 小包七錢二分

西砲臺口收銀二兩八錢八分 小包七錢二分

黃埔口收銀五兩 小包七錢二分

虎門口收銀五兩 小包一兩三錢二分

押船家人銀八兩

四班頭役銀八兩三錢二分

庫房照鈔銀每兩收銀一錢

算房照鈔銀每兩收銀二分

以上紋銀九折庫平進口規禮

放關出口

管事家人收驗輪放關禮銀四十八兩 小包四兩

庫房收禮銀一百二十兩 貼寫二十四兩 小包四兩

稿房收禮銀一百一十二兩 貼寫二十四兩 小包二兩

稿房收領牌銀一兩 小包二錢

承發房收禮銀四十兩 小包一兩四錢四分

單房收禮銀二十四兩 貼寫十二兩 小包一兩

船房收禮銀二十四兩 貼寫八兩 小包一兩

票房收禮銀二十四兩 貼寫六兩 小包一兩

算房收禮銀一兩 小包五錢

東房收禮銀十六兩 貼寫一兩五錢 小包七錢二分

簽押官收禮銀四兩 小包二錢

押船家人收銀八兩

總巡館水手收銀一兩

虎門口收銀五兩 小包一兩三錢二分

東砲臺口收銀二兩八錢八分 小包七錢二分

西砲臺口收銀二兩八錢八分 小包七錢二分

黃埔口收銀五兩 小包七錢二分

以上紋銀九折庫平

出口規禮

新柱等奏曉諭各番商摺

臣新柱朝銓李侍堯等謹奏爲奏聞辦理情形事竊照噴咭喇番商洪任輝即
洪任於乾隆二十年至二十二年前赴浙省寧波貿易冀圖另開港路仰荷聖
明遠照諭令閩粵兩省督臣曉諭該商不准再往今事隔一年洪任輝外借遞

呈之名陰爲試探之計仍行潛往經浙省即日驅逐不准逗留遂赴天津投遞呈詞上瀆勅交臣等公同查審臣等仰體皇上整飭權政彙遠恤商之至意秉公推鞠按款訊明將知情徇縱之監督李永標及婪收陋規之家人書役等按律分別定擬另摺奏請聖鑒至內地奸民難保無唆控作呈勾引往寧漁利滋事情弊現凜遵諭旨於浙粵兩省嚴密跟究惟該番商屢欲赴寧貿易今又有呷呷一船駕駛前往在浙省自必驅逐押回天朝禁令不可不再行明白宣諭臣等正在會商間據通事蔡廷助等稟稱各國番商均求稟見遂示期於八月初二日在臣李侍堯衙門逐一傳進內啖咭喇喇嚕嚕嚕嚕五國頭目人大班二班三班呖活等共二十一人臣新柱等諭以皇上待夷人的恩典最寬即如洪任輝所遞呈子皇上惟恐稍有屈抑差遣我們來審問可見無一體恤爾等的了爾等須要安靜守法不可聽人引誘滋事據衆番商同稟皇上聖明恩待遠人我們無不知道感激的當有嚕嚕嚕大嚕嚕嚕啖啖咭咭喇喇大班呖活二人面遞呈子臣等接閱與洪任輝呈內情節大略相同隨諭以天朝辦事一視同仁洪任輝所告的事已經辦了你們總是一樣不必另遞啖啖等語

首無辭又諭爾等各國向有繳送官禮一項乾隆元年特恩寬免每年免銀四萬數千兩至十三四萬餘兩不等二十餘年來共免過一百八十七萬三千餘兩爾等已沾恩不少了據衆番商同稟這是實在感激皇上天恩的又諭嘆咭喇各番商內地貨物爾等需用甚多爾等外洋物件天朝都是可有可無的爾等安靜守法在此貿易亦不驅逐若不來貿易亦不招徠寧波地方是斷不准再去去必驅逐亦屬無益倘不遵禁令是自取咎戾了據叻咭供洪任輝同稟今年又有船去是國王打發去的既蒙吩咐不准再往稟知國王即可不去又諭一切陋規替你們革除關口再無需禁可以安心在此貿易了據衆番商同稟這是皇上的恩典大家無不感激的洪任輝又稟皇上天恩我還要到天津叩謝隨諭內地洋面不許私越你不必去爾等安心在廣做買賣罷各番商咸作謝叩首而散臣等查洪任輝在粵貿易年久通曉漢語內地商民及通事買辦熟識頗多人亦巧詐衆番人無不聽從伊言但現在此案所控情節尙屬有因

殊批
公論

似難坐以罪名臣李侍堯惟有密飭地方文武時刻稽查嚴加防範若

伊安靜守法仍聽照常貿易如有交通內地奸民干犯禁令之事查拿懲究

批是即將洪任輝驅逐回國則衆番商亦斷不敢再萌往浙另開港路之心矣
所有查辦情形理合奏聞伏乞聖鑒謹奏

乾隆二十四年九月初四日奉硃批知道了欽此

福隆安等奏估修寧壽宮摺內房廡存數

奴才福隆安三和英廉劉浩四格謹奏爲奏聞估工料錢糧數目事乾隆三十五年十一月內奴才等遵旨修建寧壽宮殿宇房座節次燙樣呈覽荷蒙聖明指示欽遵辦理復經奴才等奏明修建寧壽宮工程殿座高大所需大件物料甚多非經年可能告竣酌擬分年次第修理請先修建後路殿座各歸各款隨於工竣後奏銷庶錢糧易於查核尤昭慎重等因奏准在案今據該員等估計得修建寧壽宮後中路養性門五間頭層養性殿三間前接抱厦一間配殿十間二層樂壽堂七間西邊三友軒三間三層頤和軒七間前後抱厦八間穿堂三間後樓景祺閣七間如亭一座西路衍祺門三間抑齋二間矩亭一座榻芳亭一座重簷三友軒複賞亭一座古華軒三間旭輝庭三間前殿遼初堂五間西邊延趣樓三間聳秀亭一座萃賞樓五間轉角樓做玉壺冰六間重簷符望閣二十五間後殿倦勤齋九間西邊玉粹軒三間疊落樓竹香館三間東路扮戲樓五間暢音閣戲臺一座四面各顯三間閣是樓五間兩邊轉角樓三十二間前殿做淵荻齋五間中殿做芸暉屋五間後殿做振芳軒五間後照房五

間三捲殿景福宮十五間景福門一座東邊梵華樓七間西邊佛日樓三間以上三路宮門殿宇穿堂樓臺亭座共五十五座計二百六十二間遊廊共五十五座計三百十三間淨房值房共三十四座計九十五間通計六百七十間拆砌後圍大牆長一百五十丈成砌琉璃影壁二座花臺四座各座院墻月臺丹陛甬路海墘散水並縫石臺階花斑石地面成堆青黃太湖石山影壁油飾彩畫糊裱辦造中路殿座紅黃銅鍍金瓦帽釘門釘獸面龍業以及簷椽壽山福海等項內除楠木杉木架木金磚並顏料飛金銅錫綾絹高麗紙向各該處取用外其餘工料共估需銀七十一萬九千三百五十七兩八錢五分七厘內除本座拆卸舊木石磚瓦抵除銀六萬四千七百九十五兩七錢淨需銀六十五萬四千五百六十二兩一錢五分七厘此內木植銀十一萬五千三百七十九兩五錢七分二厘除辦買栢榆雜木銀一萬七千八百三十八兩九錢四分五厘支領辦買外其餘松木價銀九萬七千五百四十兩六錢二分七厘今領用官廠木植毋庸買辦其銀扣除存庫不領查先經奏明備辦各項石料燒造琉璃瓦料磚灰繩麻生熟鐵料亮鐵槽活地丁雜料以及各作工價運價並堆山工

料等項請領過廣儲司銀三十萬兩照數扣除外其餘銀二十五萬七千二十一兩五錢三分仍請向廣儲司陸續領用統于此次工竣遵照原奏詳加查核據實奏銷至辦造門釘瓦帽釘龍葉坯片隨時請交造辦處確估鍍金所有各座內裏裝修除交兩淮鹽政辦造外再查遵奉諭旨中路遊廊內鑲嵌墨刻石西路符望閣前山上補建亭座改堆山石東路改添更道石遊廊暨垂花門院墻等項所有增減錢糧之處併其餘殿座尙有包廂裝修隔斷等項另行詳細確估具奏辦理謹將現在估需工料銀兩分晰細數另繕清單一併恭呈御覽爲此謹具奏聞乾隆三十七年十一月初六日奉旨知道了欽此

道光朝外洋通商案

陳若霖奏撫卹日本國夷民摺

新授湖廣總督浙江巡撫臣陳若霖跪奏爲撫卹日本國遭風難夷先令乘坐原船護送乍浦俟有東洋銅船出口附帶歸國恭摺奏聞事據永嘉縣詳報嘉慶二十五年九月初八日有日本國夷船一隻漂至縣境三盤門洋面適巡洋舟師到彼護帶進口當經該縣會營親詣查驗船內夷船身長八丈橫闊二丈四尺風篷桅柁槓具均皆折損不全船旁船底破碎滲漏並無字號當即查詢夷人不通漢音內有一人粗識漢字給與紙筆令其書寫據稱日本國薩州人名係園田喜三次船頭水手共一十六人自備資本於本年八月初八日從本國境內駕船出海到七島置買貨物載回薩州二十八日在洋被風打斷桅柁隨將重物拋海隨風漂流到此懇將桅柁修換貨求變價送回本國等語查視各夷內有喜三右衛門半助兩人患病隨即設館安頓撫卹等情臣即批司照例查辦一面速飭傳醫調治資給衣糧並鹽菜錢文又妥爲安撫一面購料修

整船隻以便遣令歸國去後茲據兼署布政使葉汝芝查明請奏前來臣查日本國遭風難夷循照成案應送平湖縣乍浦地方俟有蘇州官民二局商人前赴東洋採辦銅船出口責令引帶歸國今該難夷等在伊本國出海被風漂流浙洋情殊可憫既經藩司飭縣妥爲安頓撫卹病夷業已醫痊船隻修竣其願變之貨傳牙公估分售冰糖一百三十九桶共重一萬五千三百三十九觔零計每百觔估變紋銀一兩五錢七分二厘共銀二百四十一兩一錢三分零交給該夷園田喜三次收領餘剩沙糖及原來草蓆牛皮豚肉等貨亦逐一點交上船並製給禦寒棉衣及食米鹽菜柴薪等銀派撥兵船於嘉慶二十五年十二月初九日自溫港開行至乍浦口內交替一面飛飭嘉興府及平湖縣遵照一俟該夷船到乍即令挽進內港停泊仍照例安頓撫卹查明東洋辦銅船隻出口飭令引帶回國以仰符聖主懷柔遠人之至意除將該難夷姓名人數及攜帶銀兩並沙糖蓆豚等物造冊咨明兩江督臣江蘇撫臣查照仍取具起程日期並撫卹衣糧修船各冊另行具題外所有撫卹日本國難民緣由理合恭摺具奏伏乞皇上聖鑒謹奏

道光元年二月初一日奉硃批知道了欽此

阮元奏嘆咭喇巡船傷斃內地民人潛逃究辦摺

兩廣總督臣阮元跪奏爲嘆咭喇國護貨巡船傷斃內地民人畏罪潛逃現在飭令該國大班交出兇夷究辦恭摺奏聞事案據澳門同知顧遠承稟稱嘆咭喇國兵船停泊外洋伶仃山道光元年十一月二十一日兵船內夷人上岸取水並帶羊隻赴山收放民人地內種有蕃薯被夷人摘食羊隻亦踐食薯苗又誤將民人酒罈踢翻民人追奪索賠互爭鬥毆被夷人傷斃民人並據洋商呈遞該國兵官囑咐稟稱派三板艇往山取水村人下來打傷英國人十四名各等語臣查督署舊卷向無與該國兵官通行文檄之案隨飭洋商傳諭該國寓粵之大班等著交兇夷並委員前往會同新安縣查驗傷斃民夷分別究辦旋據洋商等稟稱該大班喊啞等以伊係管理買賣事務兵船與民人相毆伊不能經管並據該兵官亦稱此係官事洋商大班係貿易之人不能經管等情彼此諉延兇夷既未交出卽受傷夷人亦不送官請驗僅據新安縣知縣溫恭

驗明民人黃亦明池大河兩名因傷身死並黃劉氏黃以錦黃以贊黃以昌四人均被毆傷先後詳報前來臣查該國兵船係爲保護貨船之用卽是因買賣事務而來該大班何得將買賣兵船分爲兩事况歷來夷人與民人交涉之事俱係諭飭洋商傳諭該大班辦理該大班旣在粵省承管該國事務該國兵船傷斃民人豈能藉詞推諉向例該國夷人如敢抗違天朝禁令卽將貨船封艙禁止貿易臣卽查照舊章飭令洋商傳諭該大班將該國在粵貨船一律封艙毋許上下貨物內有已經滿載之啞咄晒等三船准給紅牌令其乘風開行回國其餘十船須俟交出兇夷後方准開艙下貨十數日後忽據洋商具稟大班等因不能著令兵官交出兇夷自行退回船上留稟交該洋商轉遞請給紅牌率同各貨船放空回國臣以封艙之事原令大班著交兇夷如該國早將兇夷交出卽可早日開艙不必疑慮若延不交兇卽貨放空回國天朝亦斷不留阻令洋商明晰開諭去後卽據洋商面呈該大班等稟稱業已遵諭問過兵船總官伶仃致傷死人兵丁如何辦理據總官對云伶仃之事果爲緊要我不能作主回國時必奏本國國主照例辦理等言爲此謹稟等情臣諭以兵船內夷人

既在內地致斃民命其殺人正兇現在該兵官船內天朝定例應由犯事地方提審究辦該兵官既知此事果爲緊要自應即將兇夷交出不能以回奏該國爲詞藉圖延宕令傳諭該大班等再向兵官告知迅速交兇毋以空言瀆稟該大班等在船觀望不敢仍回夷館亦不率衆開行復以兵船內受傷夷人未經驗視囑洋商赴司稟求經藩司程國仁署臬司費丙章酌委卸任番禺縣知縣汪云任及東莞縣知縣仲振履與水師將備帶同洋商人等前往查驗該兵官噓啣嚙率領夷兵免冠擺隊迎接甚爲恭順驗得夷兵啣吻哈噠哈面色痿黃睡臥在牀小腹有傷用藥敷蓋未便揭驗據通事傳據該夷兵供稱被民人推跌震傷臟腑並傷小腹現在腹內十分疼痛又驗得夷兵噓啣吐啞等五名傷已結痂據該兵官指稱尙有夷兵噓啣吐啞等八人傷已平復至船內夷兵致死致傷民人現在彼此互推尙未查出當日實係民人先傷夷人以致夷兵傷斃民人並據該委員等詢據洋商聲稱兵官不肯交出兇夷其意以爲民人先傷夷兵因而夷兵致死民人彼國事例可以不用抵償該委員等當以天朝律例僅有罪人拒捕格殺勿論其餘鬥毆致死人命無論先後動手均應擬抵夷

兵在內地犯事即係化外人有犯應遵內地法律辦理將律例內鬥殺格殺及化外人有犯各條簽出指示並令通事繙譯閱看據洋商復稱已告知明白等語該委員等仍飭查出兇夷刻日交案以便提同民人質訊究詳比委員等回省後即據洋商轉據該大班等稟報該兵船揚帆駛逸由委員等轉稟到臣查傷斃民人之兇夷現在該兵官船內豈有不能查出之理其言本屬支飾據稱該國先被毆傷後下手致死者無須抵償之語是否真確無從而知且該兵官係屬武員於該國所辦文案恐亦未必諳悉所言原不足信然該兵官先則不交兇夷繼因委員等譯出內地律文向其開導無可置辯卽匆促潛逃或竟係狃於該國事例膠執已見不肯遽令抵償亦未可定但該大班等係承辦該國事務之人仍應著落交兇復又嚴飭洋商諄切傳諭茲據兩司稟據廣州府及委員等轉據洋商伍敦元等呈送該大班喊啞等稟稱伊等係屬商人實難管理兵船事務且兵船已經開行伊等實在無可如何只得將此事本末寫書寄與伊國公班衙知道官爲奏辦且兵官嘯啞前亦稟明回國時必將此事奏知國主照例究辦至兵船滋事實與伊等貿易之人無涉倘蒙繼令伊等回館

照常開輪貿易伊等與衆夷商感戴不盡等情臣查該兵船既已駛逃兇夷自必隨往該大班等現在無從著交所稟自係實情現飭洋商傳諭該大班等准令各船開艙下貨仍飭大班等告知該國王查出兇夷附搭貨船押解來粵按名交出聽候究辦至該國護貨兵船向來或一隻或二隻到粵後祇許在外洋停泊派給買辦一切買物取水應由買辦承管今船內夷兵自行赴山汲取淡水致肇崦端臣並諭飭洋商傳諭該大班等告知該國王現在粵洋無盜以後無庸再派兵船赴粵如果貨船必須保護亦應嚴諭領兵官恪遵內地法度彈壓船內夷兵一切俱由大班管束經理庶兵船不敢恃蠻滋事大班亦不能藉詞諉卸所有夷人傷斃民人現在著落交兇及諭飭辦理緣由臣謹會同廣東巡撫臣嵩孚恭摺具奏伏乞皇上聖鑒謹奏

道光二年三月初七日奉硃批另有旨片留覽欽此

武隆阿等片

參贊大臣字諭咳咭喇國貿易之人木爾齊喇普知悉據葉爾羌阿奇木伯克

貝子邁哈莫特鄂散呈到爾等差人呈遞本大臣之稟字內稱爾等欲赴布噶爾貿易因大皇上邊界安靜求由境內行走爾等前曾差愛孜圖拉赴葉爾羌通信葉爾羌阿奇木伯克未將爾等來意稟明今爾自行稟懇本參贊轉奏並稱從前實有人走過具結前來等語查天朝與各外夷交通貿易俱有一定制度一定地方回疆向無與爾國人交易亦從無爾國人由境內走過爾等係欲赴布噶爾貿易之人推巴特赴布噶爾自有道路爾等之欲由境內行走者或意在順道貿易殊不知回疆各城均係鎮邊將士各城回民蒙大皇帝教養但知耕織不尙浮華爾等所貨之珍珠珊瑚等類此間全無用處

能獲利徒勞往返

至於准爾等來與不准來亦不在乎來過與否更不在乎此

結大皇帝何等尊嚴

疎

似此不合例制之事

本參贊亦不應代爾等貿易人

陳情具奏所有爾等入境之請本參贊不能准行除將爾等結字一紙發還外因爾差來之人遠道跋涉本參贊飭令葉爾羌阿奇木邁哈莫特鄂散妥爲照料賞給口糧羊麵令其回去特諭令爾等知之特諭

道光二年四月二十六日奉硃批覽

武隆阿等片二

葉爾羌阿奇木伯克貝子字諭嘆咭喇國貿易之人木爾齊喇普知悉爾等寄我的信字我已閱悉查天朝規矩均有一定誰敢變更葉爾羌從無嘆咭喇人來過我如何敢違例混稟况准來不准來亦不在有保書結除將原結字一紙發還外爾等呈參贊大人之稟字我已差人呈遞大人們現有飭諭交來人賚回爾其遵之至愛孜圖拉哈倫給我的信亦不過爲爾等求說入境的話爾將前情告知我即不給他們回信了參贊大人們因來人遠來加恩令其歇息並賞給羊麵口糧令伊等旋回特寫此字諭爾知之

道光二年四月二十六日奉硃批覽欽此

武隆阿等片三

喀什噶爾阿奇木伯克郡王字諭嘆咭喇國貿易之人木爾齊喇普鐵里伯克並推巴特頭目哈倫等知悉爾等差人來葉爾羌遞我的信字已據葉爾羌阿

奇木伯克貝子給我送來我俱閱悉爾等所求之事已蒙參贊大人批飭並給爾回諭矣爾其凜遵特諭

道光二年四月二十六日奉硃批覽欽此

愛孜圖拉供詞

訊據愛孜圖拉供年四十二歲我係溫都斯坦所管比喇里地方的人現在札納巴特地方居住這札納巴特地方亦係溫都斯坦所屬之地溫都斯坦地方被喚咭喇國征服已經五六十了了我現住的札納巴特地方被喚咭喇國征服已經二十年了溫都斯坦的頭目係喚咭喇國派來之人管理名叫果迺爾有果迺爾給札納巴特地方的頭目建築爾信字建築爾向我說叫我往比喇里地方上去等候着喚咭喇國來的兩個人我就去在比喇里地方等了一個多月喚咭喇國差來的木爾齊喇普鐵里伯克二人到來隨帶六十餘人馬十四匹騾子四頭馱載貨物駱駝二十五隻向我說他們要到西北一帶買馬作買賣還要到布噶爾地方俟至圖爾博特地方再爲商量那一路平安就從那

一路走是他這們說的我們一同起程走了十一站到了噯里木喇地方因爲駱駝難走所以將大帳房舖墊駱駝並二十個人都打發回去了從噯里木喇起程走了十二站到卓什買特地方僱人將貨物馱載起身走了八站到了色勒呢噶爾地方自色勒泥噶爾地方起身走了十站到了那罕地方自那罕起身走了七站到了畢喇素普爾地方以上經過之處均係噶咭喇國所管的地方此處有大河一道河南係噶咭喇國所管河北係音底所屬之地自畢喇素普爾起身添僱了二十個人共是六十人走了十二站到苦魯城上有彼處的頭人患病與他療治住了五個月自苦魯起身走了二十五站到圖爾博特地方我們自比喇里地方起身每到之處住歇十餘日或二十餘日不等共走了一年纔到了圖爾博特地方我們就在那裏貿易住了十三個月因爲聽得葉爾羌所屬地方道路安靜大皇帝待外番人等恩典甚重公道他們合我商量說我從前走過葉爾羌喀什噶爾安集延布噶爾等處道路熟悉着我去打聽回明要叫他們來就叫我辦買了口糧馬匹毡子襪子等項前來迎接要不叫來或你自己回來或你常住作買賣若有向這裏來的使人叫我與他給信你

拿的照票有順便帶來或以後你親身帶來亦可隨你之便他們又說嘆咭喇國的規矩凡走別城總要與其處的頭目給信他們就與葉爾羌阿奇木貝子寫了書信印了木爾齊喇普的圖記字是叫我寫的並將他們所執照票交給
我帶上我由圖爾博特起身走了五十一天到了葉爾羌這是實情

道光十一年查禁鴉片烟案

鄂山奏酌議查禁鴉片烟章程摺

四川總督臣鄂山跪奏爲違旨酌議查禁鴉片烟章程恭摺具奏仰祈聖鑒事
案照前准刑部咨開奉上諭御史邵正笏奏內地奸民種賣鴉片貽害民生請
旨飭查嚴禁一摺所奏甚是鴉片烟流毒最甚向係產自外洋奸商夾帶銷售
徧行內地屢經嚴行飭禁茲該御史奏近年內地奸民竟有種賣之事浙江如
台州府屬種者最多寧波紹興嚴州温州等府次之有台漿葵漿名日均與外
洋鴉片烟無異大夥小販到處分銷地方官并不實力查禁以致日久蔓延此
外如福建廣東雲南亦皆種賣有建漿廣漿芙蓉膏等名似此紛紛種賣若不
禁止盡絕將來必至傳種各省不特貽害善良更屬大妨耕作著各省督撫嚴
飭所屬確切查明倘有奸民種賣責成地方官立即究明懲辦並將應如何嚴
禁之處妥議章程具奏如所屬實無種賣者亦着確切查明據實覆奏總期認
眞查辦淨絕根株若日久視爲具文仍致有名無實一經發覺惟該省督撫是

問凜之欽此臣蒞任一月以來密加查訪川省五方雜聚間有吸食鴉片烟之人並聞會理州平武州一帶毗連番界尙有種植罌粟花處所當經臣一面專弁前往密查一面剴切出示嚴禁並飭行地方文武員弁一體嚴密查拿伏思

查禁鴉片烟必須先清查官吏俾免包縱徇隱諸弊

緣此所見至當正百官以正萬民之義要在認真嚴辦

現飭藩臬兩司密查各官員內如有執袴積習嗜食鴉片者自必怠惰偷安貽誤公事即據實詳揭以憑參辦并令嚴查各衙門官親幕友長隨書役如有向食鴉片烟立即照例加等治罪如此認真稽查官則自顧考成管束必嚴丁胥知所警懼改悔必速在官人役既無偷食之事無所顧忌必能認真訪拿偷食販賣之人破案究辦並令獲犯到案時於食鴉片烟之人追究買自何人於販鴉片烟之人追究賣於何人令其據實供明立即根拿究辦毋稍輕縱並令該地方官平時傳諭鄉保甲長互相稽查如實有父兄禁約其子弟及聞拿改悔切實有據者均准自首免罪若查有偷食販賣之人即行舉報查拿究辦將首報之人從優賞賚以示獎勵倘容隱不報別經發覺將縱容之父兄牌照例責懲本犯依例科罪造賣烟具者以製造烟具論罪再食烟之人販賣烟之人

必多查鴉片烟來自外洋奸商私行夾帶販往各省售賣以圖重利查禁愈嚴包藏愈秘一經貨物落地驟時搜查爲難自應於各關隘口嚴密稽察查夔州府爲浙江廣東等省入川要路寧遠府爲雲南省入川要路廣元縣爲湖北等省入川要路現飭行各關隘凡遇客商過關務將貨物逐細查驗不得僅以徵收稅課了事如查有私帶鴉片烟泥立即究辦倘關隘書役受賄故縱及勒索栽誣將該書役及失察之本管官一併照例參辦至會理州等處私種罌粟花聞多在毗連番界窮鄉僻處所飭令該地方官於徧查保甲之便遍歷查看如有私行種植立即犁毀將地主照例治罪田土入官並嚴飭各土司曉諭夷民毋得私行栽種並令該土司於每年冬間親往履查如查有私種卽行拔毀將該夷民照例枷責田土歸土司招種如該土司不能認真查察卽將該土司參革示懲如此設法稽查則私食私販私種之弊可以漸次剔除而保全民命無廢耕作以期仰副皇上惠愛黎元之至意第有治法尤貴有治人查禁鴉片烟須責成各州縣仿照徧查保甲之法牌長每旬出結於甲長甲長月半出結於保正保正每月出結於地方官均令出具甲內並無種植罌粟花販賣及買

食鴉片烟之人如經查出甘願連坐切結並令客店居停遇有過往客商入境投宿不動聲色明查暗訪倘有販賣買食之人密稟拿辦夾帶鴉片之徒照種賣罌粟熬烟地土入官之例將貨物一半入官一半給首報之人充賞並行令該管道府因公巡履各屬留心察看如地方牧令奉行不力即詳揭請參並令道府於年終出具所屬並無種賣鴉片烟切實甘結由臣彙總具奏如該管道府並不認真稽查率據各屬結報將來別經查出即行嚴參懲辦斷不敢稍事姑容致干罪戾合將違旨酌議查禁鴉片烟緣由恭摺具奏伏乞皇上聖鑒訓示謹奏道光十一年十月初一日奉硃批欽此

巡視西城覺羅瑞福劉光三等拿獲販賣鴉片烟之王二等請交刑部摺

臣覺羅瑞福
臣劉光三

跪奏爲拿獲販賣鴉片烟人犯多名請旨交部審

辦事竊思鴉片烟流毒最烈甚爲風俗人心之害屢奉諭旨認真查拿不得日久視爲具文等因欽此臣等巡視西城嚴飭司坊官無分畛域實力查拿於本年六月十六日據吏目王垂方揀調吏目曹汝舟拿獲賣鴉片烟之黃深等一

案七月初七日拿獲食鴉片烟之童亮等一案歷經臣等咨送刑部辦理嗣因各處仍有販賣并買食之人卽飭司坊官密訪速拿茲據正指揮許惇書會同揀調南城正指揮羅禮蘭查訪確實選派幹役協同各該處營兵坊捕於宣武門外棉花頭條胡同地方拿獲賣鴉片烟之王二一案又於魏染胡同富順客店內拿獲賣鴉片烟之焦四買烟人潘大店夥何得一案又於正陽門外打磨廠粵東會館內拿獲賣鴉片烟之蕭升看館人張賓一案於各該處起獲烟袋銅鍋及熬土食烟器具各數十件並於王二家內起出寶心骰子焦四屋內起出骰子骨牌各賭具先後呈解前來臣等公同逐案研訊王二供認買土賣烟屬實其賬簿已聞拿燒燬焦四之賣烟有買烟人潘大爲憑蕭升之賣烟有看館人張賓可證至各犯所買鴉片土或稱販自天津海船或稱買於廣貨擔上切實究詰皆不肯供出姓名伏思食烟人犯甫經刑部核議奏定酌加罪名販賣之人厥罪更重復經臣等歷次拿辦乃該犯等或居會館或寓客店售賣如常實屬恣不畏法且恐有夥同興販之人及窩賭不法情事非澈底究辦不足以示懲儆相應請旨將王二焦四潘大何得蕭升張賓等交刑部逐案根究確

情照例懲治臣等仍嚴飭司坊官認真查訪有犯必拿送部治罪使販賣者畏沮食烟者改悔以仰副我皇上嚴禁烟土飭俗愛民之至意爲此繕摺具奏伏祈聖鑒訓示謹奏道光十一年十月二十二日

內務府奏審擬張進幅鴉片烟案摺

總管內務府謹奏爲遵旨覆審定擬具奏仰祈聖鑒事竊照刑部審擬太監張進幅買運鴉片烟土一案於十月初八日具奏奉旨此案太監張進幅買運鴉片烟土既經破案必應徹底嚴究乃刑部審訊擬結頗有不實不盡之處著將全案人証交內務府大臣再行嚴訊務得確情按律定擬具奏欽此旋經刑部將太監張進幅劉成王貴玉郭志民人秦寶全褚大楊魁元呂莘田並烟具烟土以及各犯供詞全案解送來前臣等查閱原摺內稱太監張進幅向充掌儀司他坦差使吸食鴉片烟已閱三十餘年其同吸之人僅止太監劉成王貴玉郭志等三人因患病告假借住回子貝勒克柯色布庫家閑房因素與交好卽在彼時常吸烟復因欲往天津購買烟土曾向克柯色布庫告知借得京錢一

百吊克柯色布庫並未與之同吸鴉片烟各等情茲經臣等遵旨將此案連日督同司員將各該犯隔別嚴鞫無如張進幅一味狡展堅執刑部原供並不吐實隨加以擗耳刑嚇亦無端倪因思此案張進幅吸烟年久又不將夥吸之人供出若無確實證據該犯仍堅不吐實是以密派番役將在他坦年久蘇拉劉連升並克柯色布庫家丁壽兒查傳到案覆加嚴鞫當據劉連升供稱張進幅素食鴉片烟不止太監劉成等三人尙有首領太監熊來福太監于輝楊幅民人朱玉鳳並克柯色布庫亦時常到他坦同吸並未見有別人質之壽兒亦云伊家主常到他坦並在家借住均與張進幅吸食鴉片烟供吐不諱訊之太監劉成王貴玉郭志等亦俱未敢隱飾衆口一詞歷歷如繪隨將張進幅提出令其據實供吐伊自知無可掩飾始據供認伊吸食鴉片烟已閱二三十年之久從前同吸之人有已故太監鄭進玉並告病爲民太監李資福又有同在掌儀司當差之太監劉成王貴玉郭志此三人皆係偶患腹瀉胃氣疼痛經張進幅勸其吸食又有從前與其常吸之首領太監熊來福太監于輝後來亦不常來並有偶爾來吸之太監楊幅及太監何進祿實係因伊患病也曾勸其吸過一

二次此外太監並無別人尙有民人朱玉鳳常同吸食又有回子貝勒克柯色布庫因道光九年隨團常向其尋要茶水並到他坦更換衣服曾與之相識後來亦常到他坦見其吸食鴉片烟亦隨與之吸食不記次數迨張進幅告病因想克柯色布庫素來相熟隨帶同僱工秦寶全往彼借住即在彼同克柯色布庫吸食鴉片煙從前所用鴉片煙係零星買自回民褚大之手後聞天津海船到來烟土較賤曾向克柯色布庫要得京錢一百吊並賣驛車價值一併易銀帶同秦寶全前往天津經秦寶全轉託素識之楊魁元向張二等用價錢二百四十吊買得烟土一百六十兩楊魁元得錢三吊八百文事畢回至朝陽門當被弋獲各等供返覆研詰矢口不移案無遁飾並訊之熊來福于縣楊幅何進祿同張進幅吸煙次數均屬相符復派司員訊取克柯色布庫親供伊亦俯首無詞承認不諱自應按例分別擬結查例載輿販鴉片煙照收買違禁貨物例枷號一個月發近邊充軍爲從杖一百徒三年如私開鴉片煙館引誘良家子弟者照邪教惑衆律擬絞監候爲從杖一百流三千里待衛官員等買食鴉片煙革職照違制律杖一百加枷號兩個月軍民人等買食者俱杖一百枷號一

個月內廷太監買食者枷號兩個月改發各省駐防給官員兵丁爲奴等語此案張進幅身充太監胆敢吸食鴉片煙至三十餘年之久並引誘回子貝勒克柯色布庫以及同伴太監等一同吸食迨至因病告假外出又復私往天津運買煙土實屬慙不畏法應照私開烟館引誘良家子弟者爲從例杖一百流三千里係太監擬加重先行枷號兩個月發往黑龍江到配再加枷號一年滿日給兵丁爲奴首領太監熊來福太監于鄰劉成王貴玉郭志均供會同張進幅吸食鴉片煙應照內廷太監等買食者枷號兩個月改發駐防爲奴例係太監應將熊來福革去首領同于鄰劉成王貴玉郭志俱枷號兩個月發打牲烏拉給官員爲奴太監何進祿楊幅均供因病被太監張進幅引誘吸食質之衆供亦稱該太監等實係吸煙一二次自應量爲末減擬將太監何進祿楊幅俱枷號兩個月發吳甸劔草二年回民緒大以售賣玉器爲名竟敢私販鴉片煙膏積次賣與太監張進幅吸食希圖漁利緒大合依與販鴉片煙枷號一個月發近邊充軍例枷號一個月發近邊充軍民人秦寶全既同張進幅吸煙又復跟隨張進幅潛往天津買煙興販秦寶全應與輾轉代買煙土得錢之民人楊魁

元均照輿販鴉片煙爲從杖一百徒三年例杖一百徒三年民人朱玉鳳訊與張進幅認識並同吸食鴉片烟朱玉鳳合依軍民人等買食者杖一百枷號一個月例杖一百枷號一個月滿日折責發落至蘇拉劉連升跟役壽兒於到案後卽行供吐實情訊屬無干應與車夫曹順均行省釋舖夥呂莘田犯名店號均不相符應行解回天津縣俟傳到張二等到案認明再行辦理其未獲之爲民太監李資福民人王六穆大張二韓七一併嚴緝獲日徑行解交刑部擬結現獲之鴉片烟土烟具等物案結銷毀至張進幅在掌儀司他坦吸食鴉片烟該管之首領太監等漫無覺察實屬疎忽相應請旨將掌儀司八品首領太監陳貴明趙吉祥無官職首領太監崔慶李永清陳百祥等均罰月銀半年總管太監等失於覺察亦屬疎忽應請均罰月銀三個月至克柯色布庫身爲回子貝勒不知自愛與太監交接已屬違禁又同太監吸食鴉片烟及至張進幅告病外出復敢容留在家居住種種乖謬實屬卑鄙無恥應請旨將克柯色布庫交理藩院治罪所有臣等遵旨審明定擬緣由理合恭摺具奏是否有當伏候訓示遵行爲此謹奏請旨道光十一年十月二十九日

總管內務府大臣 臣禧 恩

總管內務府大臣 臣耆 英

總管內務府大臣 臣博啓圖

總管內務府大臣 臣敬 徵

總管內務府大臣 臣阿爾邦阿

總管內務府大臣 臣克蒙額

瞿溶奏職官私食鴉片番役人等索詐多贓摺

山西道監察御史降二級留任巡視北城臣瞿溶跪奏爲職官私食鴉片煙番役人等索詐多贓請旨交部究辦事竊照近年以來京城內外販賣鴉片煙土及買吸者日甚一日臣奉命巡視北城屢飭司坊各員嚴密查拿旋經訪獲熬烟之王升錢學詩施升等各犯先後移送刑部辦理在案茲臣風聞捐納光祿寺署正溫灼橋在宣武門外門樓胡同地方賃房居住由該員原籍廣東私帶鴉片烟進京在寓所吸煙已非一日經該員廚役王升向坊役楊升即楊三告

知伊主吸煙情由楊升復向番役王三告述商同前往索詐遂於十月十六日夜番役王三帶同散役數人楊升令散役陶福章邢平三兒帶同廚役王升作綫借至該員寓所跳牆進內將該員並同吸煙之黃姓蔡姓一併鎖住起獲鴉片烟兩滿匣又半匣約重數十兩鴉片烟管三枝番役王三等向該員等嚇唬索詐銀一千兩該員等畏懼應允先付王三銀二十五兩王三當謝給廚役王升銀十五兩隨勒令該員寫立一千兩銀票內改溫姓爲張姓約期付給嗣有開北天順人參局之江文鐸阻止該員不給銀兩復經該役等邀同西河沿居住之王四將該員拉至家內逼勒付給銀六百兩交該役等收受王三復將起獲之鴉片烟挑出十餘兩給散役等賣錢分用餘烟王三取去並將烟管三枝砸毀寢事未經報官伏查職官私食鴉片烟已屬大干例禁而輦轂之下囊役詐贓竟至盈千累百尤屬目無法紀爲此據實奏聞請旨飭交刑部傳集案內一千人證切實根究按律嚴辦以肅官常而懲蠹役再楊升即楊三係北城吏目衙門捕役應俟刑部審明定案時查取該坊官失察職名照例議處合併聲明伏乞皇上聖鑒訓示謹奏道光十一年十一月十一日

史譜奏現無種賣鴉片摺

陝西巡撫臣史譜跪奏爲查明陝省各屬現無種賣私食鴉片烟遵例具奏仰
祈聖鑒事竊照鴉片烟一項產自外洋遍行內地貽害民生莫此爲甚臣前奉
旨飭辦當將確查嚴禁緣由恭摺覆奏欽奉上諭著飭令各州縣留心訪查每
屆年終出具並無種賣鴉片烟切實印結詳報該撫具奏一次又刑部核議給
事中劉光三奏請酌加買食鴉片烟罪名一摺欽奉上諭令各督撫及地方道
府州縣等官出具署內並無買食鴉片烟甘結於年終彙奏一次等因欽此仰
見皇上剔奸除害正俗教民之至意臣即欽遵轉飭藩臬兩司移行各該道府
責成所屬認真查辦並恐日久生懈有名無實復又節次剴切嚴飭去後旋據
藍田縣訪獲客民劉萬川兌換廣東貨客馬廣太鴉片烟土希圖轉賣漁利一
起又涇陽縣訪獲客民孟武坤收買廣東客民何六鴉片烟轉賣並民人王自
成買食一起又南鄭縣拿獲客民張元私食鴉片烟一起業將劉萬川等照依
新例分別擬以軍徒枷杖詳請咨部一面移會廣東嚴緝馬廣太等務獲究辦

各在案此外各屬亦據陸續按季稟報選派妥役各在所管地方嚴密緝緝並
於因公下鄉之時留心訪查實無種賣鴉片烟及署內容有私食之人茲屆年
終據各廳州縣出具印甘各結由該管道府加結移司會詳請奏前來臣隨逐
加確查陝省民情向稱淳樸物土之宜只知播種麥豆其山地本屬磽瘠僅能
栽植包穀雜糧委無私種鴛粟花造作鴉片烟膏之處並與藩臬兩司各在署
內不時稽察均尙無買食情弊伏查此事疊奉聖諭諄諄之訓誠臣惟有督同
各屬倍加留心嚴密查辦斷不敢因現無種賣私食或致視爲具文稍涉疎忽
除仍飭令隨時訪拿嚴禁外所有十一年分陝省各屬現無種賣私食鴉片烟
緣由理合遵例恭摺具奏伏乞皇上聖鑒謹奏道光十一年十二月初七日

中華民國十九年七月十一日出版

史料旬刊第五期

編輯所 故宮博物院文獻館

發行所 神武門外發售室

印刷所 京華印書局



		郵費		價目表		
		外埠	外國	四角	六角五分	十二元
本市	上海	每期一角	每期二角	每旬一冊	預定半年十八冊	預定全年三十六冊
	天津	其他各大書店均有代售		本院發寄刊物均交郵局掛號遞送以免遺失		